

來下我頂上却向天以杓柄正向前指東也
存陰精真人二星親泊頭頂上陽明玄冥二
星却在上也陽明陰精二星在後面玄冥真
人在前面於是騎歸存念位定又思三一之
尊君忽見變生共出在斗魁之中須臾三卿

君復坐如三尊須臾見六人俱登玄冥網行
東去達天關而止俱向我口又存見上元手
扶上卿中元手扶中卿下元手扶下卿也我
乃咽氣一通良久上元二人從氣中來入我
口上昇還泥丸宮次咽氣一通良久中元二
人從氣中來入我口中歸絳宮次咽氣一通
良久下元二人從氣中來入我口中咽入下
丹田中存天關星令去口七尺星在口前三
元入我三宮中都畢乃精念真一各安所在
坐卧思之在心有所願事事心啟之所求
者亦心啟求之存思唯令靜寂若寢室內晝
日亦可存思
立春存三一東向如立春精思
立夏存三一南向如立夏精思
立秋存三一西向如立秋精思

立冬存三一北向如立秋精思

存思三一各安其宮畢乃微祝曰

五方命斗神致七星三尊變化上招紫靈六
神徘徊三官丹城玄通大帝下洞黃寧天真
保衛召引六丁神仙同濟乘煙三清四體堅
鍊五藏自生

鍊五藏自生

雲笈七籤卷之五十

正一天師清微弟子百堅製作

道教學術資訊網站

雲笈七籤卷之五十一

職一

秘要訣法 行功要

八道命籍

八道命籍一名八間一名八達又名八解纏
錦繡結謝罪延福妙經太素三元君受於自
然之章封於太上靈都紫房之內金章玉華
三百人侍衛典香東海小童四極真人西城
王君封於峨嵋之山西室之中萬劫一傳有
玄名帝簡紫字青宮玉藏之人千年之內聽
得三傳上學之子不得此文虛因山林終不
得道所謂八道者日月四時八節所行也日
行赤道月行黃道黃赤二道陰陽之所恒行
至於立春春分日月行青道二道出黃立夏夏
至日月行赤道二道出黃立秋秋分日月行白
道二道出黃立冬冬至日月行黑道二道出黃此
八道也日月行八道之日各有變化翔飛瑞
動含蒸之流草木飛沉隨緣感應改故易新
輕者或更重重者或更輕善惡迴換惡象之
運自然而然上學真人因變行化習吉除凶

進善黜惡申明棄闇入正治邪練偽成真屬
思登聖其法高妙茲道玄通故曰八達至極
無窮矣

一道命籍立春清朝北望有紫綠白雲者是
太上三元君三素飛雲也正存之叩頭搏頰

各九心禮四拜再密呪曰

曾孫名今日幸遇三元君出行願得長生侍
給輪轂餘所言隨人意也某病乞差某厄乞

度某災乞消某事乞果三見雲舉白日昇仙
不須復存思千百所施為行此必有仙錄是

故謂之八道命籍也

二道命籍春分夜半子時東北望有玄青黃
雲是太微天帝君三素雲也存思密呪皆如

上法

三道命籍立夏清旦北望有紫青黃雲者是

太極上真君三元內宮真人三素雲也存思

密呪皆如上法

四道命籍夏至清旦南望有赤白青雲者是

扶桑大帝君三素雲也存禮密呪皆如上法
五道命籍立秋清旦正西望有白赤紫雲者

是太素真人天皇白帝君三素雲也存禮密
呪皆如上法

六道命籍秋分清旦南望有素赤黃雲者是
南極真人上皇赤帝三素雲也存禮密呪皆
如上法

七道命籍立冬清旦西南望有綠紫青雲者
是上清真人帝君皇祖三素雲也存禮密呪
皆如上法

八道命籍冬至清旦正東望有朱碧黃雲者
是太霄玉妃太虛上真人三素雲也存禮密
呪皆如上法

右八道命籍之日月未至一二日先沐浴燒

香以待至日依時出望一食頃還室陰雨則
不望非其日忽見此雲禮呪如上三陪勝於

其日也凡先身今身前世今世罪結不除護
謝不的原恕賒違功行難進魔試不知多致

退落衰老易至求昇難期一去長夜幽苦未
央上學之士悟此驚心誓志仰慕感玄微靈

能得命籍的斷罪根解釋惡結滋長善源群
邪不敢干得真必速諦念密修即有驗矣

八道祕言

開心靜室家朗虛真逸想妙觀騰躍玄人苟
誠感上會精悟輝晨亦將得見丹景之然三
素飛雲八輿朱輦紫霞瓊輪上清淨眇徊轡
三元高皇東節靈童攀轅太素擁蓋南極臨
軒於是冥光外映濛蔚龍顏象燭太虛流逸
七觀也子能見之則白日昇晨不煩凝霜濯
華玄映金丹也

一道祕言曰以八節日清朝北望有紫綠白
雲者是為三元君三素飛雲也其時三元君

乘八輪之輦上詣天帝子候見之當再拜自
陳乞得侍給輪轂之稅矣三見元君輦者則

白日昇仙

二道祕言曰以八節日夜半東北望有玄青
黃雲者是為太微天帝君三素雲也其時太

微天帝君乘八景之輦上詣高上玉皇也四
見天帝之輦者則白日有龍輦見迎而昇天

也

三道祕言曰以甲子上旬戊辰巳巳之日清
旦西北望有紫青黃雲者是為太極真君真

人三素雲也其時太極真人乘玄
景綠巖上詣紫微宮九見太極舉者則白日
昇仙

四道秘言曰以甲戌上旬戊寅己卯之日清
旦東北望有赤白青雲者是為扶桑大帝君
三素雲也其時扶桑公大帝君乘光明八道
之輦上詣太微宮七見之者則白日有雲龍
見迎而昇天也

五道秘言曰以甲申上旬戊子己丑之日清
旦正西望見白赤紫雲者是為太素上真白
帝君三素雲也其時太素上真人白帝君乘
備條玉輦上詣玉天皇皇高真也十四過見
之則白日昇仙

六道秘言曰以甲午上旬戊戌己亥之日清
旦正南望有素赤黃雲者是為南極上真赤
帝君三素雲也是時南極上真赤帝君乘絳
琳碧輦上詣闕風臺十過見之則白日昇仙
七道秘言曰以甲辰上旬戊申己酉之日清
旦西南望見綠紫青雲者是為上清真人三
素雲也其時上清真人乘玄景八光丹輦上

詣高上九天帝君四見之者則太一來迎白
日昇仙

八道秘言曰以甲寅上旬戊午己未之日清
旦正東望有朱碧黃雲者是為太虛上真人
三素雲也其時太虛上真人乘緋徊玉輦上
詣太微天帝君十五見之者則白日昇仙

右八道秘言見者當再拜自陳如上法三素
雲各自有色色氣上下相沓積如所次說也
假令八節日見三元三素雲者則紫雲在上
綠雲次之白雲在下共相當也子謹視之上
旬者謂甲子之日初八月上十日之內有甲
子日是也非其時日而見此雲者亦當拜祝
則三倍於其日見也他日効於甲子矣行九
真司八道之事者則天人衛護真皇守其命
骨矣夫非有仙名玉籍者亦不能遇此經見
之者皆玄書宿名應為仙人故也七百年內
聽得三傳施行此道者勿令人犯其履履弄
其中榻也七魄變成龍虎守人地關伏於履
履之下三魂化成靈光之雲映其中中若有
犯之者則心震意惕惕然自失所以神虧魂

散精光翳滯也常慎之侍書有玉童玉女各
七人言白有經者之功過攝萬邪之不祥若
子視文皆燒香於左右面也傳授之時對齋
四日立誓委盟為不漏不宣之約須得其人
然後乃可付耳違科負盟七祖父母受拷於

玄都地獄身死下鬼如四極明科太虛真人
南嶽赤松子曰此經或名九素上書或名太
極中真玉文或名八道金策按四極明科受
書皆立誓約盟不傳泄以代軟血割髮之信
驗也其受九真太上真文曉白素九十尺其
受八道秘言黃老隱法曉素絲八兩其受太
上鎮生五藏雲腴之法曉金縱容珠二枚以
為閉密藏之誓若有違盟泄露如神州四極
法晉永和七年歲在辛亥十月四日丁巳夜
受劉君九真中經八道秘言齋盟如法

太上曲素五行秘符 太極左仙公撰

太上啓後聖金闕帝君曰元氣分判天地開
張陰陽貫位三五成官玄置六甲化生五行
金木水火土總御中元以炁相生混合成真
後學求仙不知道源徒勞存思損疲形神積

涉無感望道派派夫欲尋本當歸其根失根
求生萬不得全今欲抄集上皇王文出以相
告子擇賢而傳其法實秘望不在言可依明
科承而奉焉

太上五行秘文與天地同生混仙萬真總御
神靈天無五行則三光不明地無五行則山
崩嶽傾人無五行則身朽零故五行混合相
須而生若有志心當尋真名既受其法天地
同根呼魂招魄保命役神修之九年克登上
仙夫受曲素訣辭學上真之道當知五行父
母真君內諱存以招魂召以制魄魄魄長存
真神總歸宮宅備守形身便得反於自知若
此克遂遊宴玉清與然合真矣
凡修此道當以甲乙之日入室燒香東向存
思甲父乙母二真之神父諱青嬰冠九玄碧
寶玄冠衣翠羽章衣手執青精保命秘符母
諱浩先頭作頽雲之髻著飛青錦帶手執化
生丹霞符二人以玄符授我身便叩齒九通
呪曰
真君父母化生二靈三五反真與元合冥外

攝遊魂內固魄精長居宮宅無雜我形長與
三元同保三清畢服符又叩齒九通嘽液三
過止修此九年洞觀無窮徹視遠聞逆知吉
凶

丙丁之日入室燒香南向存思丙父丁母二

真之神父諱樞戶冠朱陽通天寶冠衣絳章
之衣手執朱明保身長存秘符母諱納靈頭
作飛雲之髻衣丹羅飛帶手執中原黃精秘
符來授我身便三呼二真內諱呪曰
陰陽變化二景生真玉靈及魂拘魄鎮神三

五混合無雜我身得保日月三景齊養畢服
符又叩齒九通嘽液三過止修此八年真靈
降見雲警來迎
戊己之日入室燒香向西南存思戊父己母
二真之神父諱長御冠黃華三寶玄冠衣黃

章單衣手執中元度命秘符母諱來生頭生
二角頽雲髻著黃錦飛帶手執金咒自然秘
符來授我身便三呼二真內諱呪曰
中元玄紀攝御四方化生五炁混合帝房拘
魂御魄與形合同長保天地歷劫無窮服符

畢又叩齒九通嘽液三過止修此十二年徹
見八方身化金光乘虛太空

庚辛之日入室燒香西向存思庚父辛母二
真之神父諱啓明冠九元碧寶玄冠衣素羽
衣手執素靈召神保命秘符母諱德神頭作

飛雲之髻衣素錦飛帶手執玄陰生形上化
秘符來授我身便三呼二真內諱呪曰
金精玄注結炁九靈流真混合灌養身形使

我魂魄安鎮黃寧飢食三元渴飲玉精乘虛
駕浮遊宴紫庭仍服符畢又叩齒九通嘽液
三過止修此六年得駕景霄晨出入紫房

壬癸之日入室燒香北向存思壬父癸母二
真之神父諱朔靈冠玄晨之冠衣皂執單衣
手執通靈長命秘符母諱法勞頭作頽雲髻

衣玄錦飛帶手執飛仙騰化秘符來授我身
便三呼二真內諱呪曰
上有九元化生陰陽五行參差金剛反強三

晨寶耀冠我衣裳五色流黃天關開張上昇
玉清出入帝房乃服符畢又叩齒九通嘽液
九過止修行五年洞視無涯逆知吉凶乘虛

駕海上昇霄晨

玉珮金鑄黃本童附

上靈元年正月一日六元合慶甲子直辰元始天王與大帝君共乘碧霞流騰紫輦上登九玄之崖無色之端徘徊洞天道遙極元流眇縱體適意浮輪有青鳥來翔口銜紫書集於玉軒奉受記文曰玉珮金鑄大極金書玄真洞飛二景寶經二君以金青盟天稟受上具鑄金為簡刻書靈文使龜母按筆太一拂筵盛以雲錦之囊秘於鬱森之笈封以玉清三元之章付仙都老公侍仙羽即藏太素瑤臺玄雲洞室玉珮者九天魂精九天之上名晨燈一曰太上隱玄洞飛寶章處於玉清之館太霄之中結青陽之炁靈照九天青光沌沌洞照三元之臺色如青玉形如月圓內有空玄玉臺紫殿則魂精帝君處在中央太霄隱書云玉珮玄臺南軒之文經曰欲求長生宜先取諸身月華月精日霞日精左迴玉珮右把金鑄二景纏綿雙神安康上行太極下造十方堅存玄真寶固靈根玄谷華嬰灌映

沉珍漱月咀日以入天門金鑄仰注玉珮執關青白分明通我泥丸竇液閉精鍊柔身形三君備衛丹絳之裙珠繡華帔飛錦青裙帶月銜日首建紫冠安坐明堂陰以七元黃庭戊己塞鎮邪源恭司二子無英白元桃康三老當我生門通徹五府十二之綸吐納六宮魂魄歡欣却此百病辟熱除寒二景纏絡萬神內歡有明其文飛昇南軒把金鑄玉珮入景玄光九天同靈玄母齊房陰哺陽導明色鮮容位刻丹室名題帝宮三周九度與運混同此玉珮寶文太極玄真之經也能修之者皆飛行太虛逸放九清白簡結錄東華書名西王母令刻書此於崑崙之山玄圃之室自非清虛之質不得窺參天欲騰九清宴南軒迴玉珮於明堂引金鑄於泥丸降魂真於晨燈招飛景於帝君凡行此道當以暮卧兩手撫心閉目在景存玉珮青陽之氣光色沌沌如月之圓靈映兆身洞達一形魂精帝君姓開明形長九寸頭建紫冠披珠繡華帔衣飛錦青裙帶月銜日乘御青鳥在青光之中下

降兆身安鎮泥丸兆當叩齒九通嘯流二十七過陰呪曰
玄元太靈九天魂精晨燈朗映結炁光青瓠曰玉珮洞耀太明帶月銜日建符執鈴華光流煥音天靈冥乘空控翻丹轅紫駟先安三元迴降我形鎮在泥丸下流黃庭檢魂束魄萬鬼安寧五藏結絡九穴華榮八景騰飛外入玉清畢以手相摩令熱拭目二十七過嘯炁三過止便卧如此則魂安魄寧萬神鎮宮內固靈氣外塞邪源八景變化鍊真變仙行之九年尅能洞觀幽冥達究未然坐在立亡與神對頽一十八年道成真降飛行上清學無此法則三魂不守七魄不寧三尸飛翔九蟲奔驚攻伐形內來邪通精神炁散遊體不潔清徒勞燕液損炁喪靈有得此道克成長生寶慎密修命胡可傾金鑄以九天魄靈九天之上名曰虹映一曰上清華蓋陰景之內真處上清之館太霄之中結白煙之炁靈映九天白光奕奕洞觀上清色如白雲形如玉山上有瓊林之宮則魄靈帝君所處太霄隱書

金鑑之經於玄臺北軒之內文曰欲求飛仙當鍊魄靈魄靈魂精九天俱生二景纏綿雙神洞明右迴金鑑左旋玉鈴流光紫虛耀真上清飛行太極下造八冥堅存玄真保固華嬰日月交溉玄谷益盈玉珮金鑑青白分明鎮我明堂魂安魄寧是謂華蓋九天帝靈紫繡珠被飛羅丹幕帶日銜月首建華精安坐明堂陰以七星上降陵梵務猷黃寧三老帝尊固我長生通徹胃管六府五庭虹映纏絡萬神衛形有得其文飛昇上清此金鑑寶文

○上清陰景之內真能修之者皆上步霄霞遊遊太極寢宴九空遊行紫虛也西王母令刻書此文於崑崙山積石之陰自無玄圖帝簡錄字丹臺此文不可得而披也夫欲騰景九霞之上還身上清之中迴金鑑於泥丸引玉珮於明堂降華蓋於虹映招飛景於帝君者常以雞鳴天光未分之時叩齒二十四通思金鑑白雲之氣光色奕奕如玉山映靈兆身洞達一形魄靈帝君姓暉諱閻元形長九寸頭建華冠披紫繡珠被飛羅丹幕帶日銜月

乘白翮之鸞在白光之中下降兆身入明堂之中便引炁二十四嚙陰呪曰

九天魄靈元始上真虹映峨峨白光玉山號曰金鑑天帝之神帶日銜月迴纏白鸞上宴玉清出入三元迴降我形安鎮靈關拘魄御魄萬神自歡五内生華靈秀玉顏衆雲飛行上昇帝晨摩兩掌令熱拭額二七過檢兩目後二七過嚙液二七過止此則金鑑下映帝君安鎮萬神總歸身生光明行之九年之內飛行上清矣

○又當以月一日及甲子太歲本命之日清齋八室白書九天魄靈太霄陰符於青紙上夜半向東方叩齒二十四通誦金鑑之經一遍存金鑑白氣之光當奕奕洞明如玉山靈映兆身洞匝一形兆引白光二十四嚙止服太霄陰符微呪曰

玄陰七雲九天魄精玉山奕奕虹映上清金鑑玉珮與天同生二景纏綿下降我形列奏丹臺刻書紫名得乘飛輿流黃鸞冥飛空騰虛身入洞庭上享無極與天齊靈摩兩掌

拭額三九過手接目外皆一七過又嚙氣三七過止

黃衣童

華陽諸洞記曰黃衣童者即玉珮金鑑之宮耳凡坐上常有一人共坐眈眈者即太極真人也時或往來蓋受行玉珮金鑑經者自然致太極真人耳言云服九靈日月之華得降我太極之家此之謂也凡修太霄之道存迴金鑑玉珮之法當兼日月之精以鍊五胎之神招日中五帝月中五夫人二景玄映下降我形使面有玉澤體發奇光內外洞朗心聰目明於是玉珮可挹金鑑可旋也魄魄帝尊將愆子之房晨燈虹映之光將可立昇也

流金火鈴 推成大祝附

流金火鈴以太上大道君遊宴之圓光上激九天之威下滅六天之凶玄光靈映道君之項流照八極四十萬里三天立正之初罷除六天之始以傳太微天帝君神文藏於瓊宮玉房之內靈光自明煥赫上清飛龍毒獸異其側紫雲玄暉蓋其巔玉華之女金真之童

各三百人典衛靈文散香虛庭積七千年化生五符光徹八方因有五方營衛之官太微天帝君以傳金闕後聖道君後聖道君以付上相青童君使授諸為真人者佩遊上清學真之夫而無流金火鈴項生圓光皆不得上

登三光若有金骨玉質玄名青官得受此文佩之而行諸天諸地四海五嶽率天眾聖仙官莫不稽首來迎淨光駭動所制不輕三元立遣玉女玉童三十六人侍衛其身佩之九年得乘八景玉輦飛行太空流金火鈴者九星之精一名圓光太上之威幸生於九天之先結氣成文光明煥赫徹照十方懸精垂映太上之項積七千年化生五符神符玄降太微天帝君威攝八極天之魔神布之霞庭率天以下莫不總統太上帝道君寶秘此道告下普天主司真仙或觀察輕淺有真仙之才得佩此符不依玄科而輕付非真裁慢靈文皆七祖受缺考及先師同充鬼官以紫縉二尺二寸朱書戴之頭上若有金名玉骨得佩此文皆宿命應仙佩符之身出入遊行恒當存

想已身項上有圓光映照四十萬里之外九年之中勤心念真清禱為志克得真靈下降圓光自明乘空而行坐在五七

五鈴登空虛保仙上符 在本經
流金火鈴內存振威大祝

修佩流金火鈴出入遠近經履危險寇病之中危害之下當存真光以自衛開道萬里之路發行之始正向其方叩左齒二七通咽炁三十六過思所在之處形象山林草木人民禽獸神靈分明朗然皆來朝拜我身思北斗七星覆我頭上仍存我左目為奔星右目為迅電其光煥赫奔星九萬里外所見之道路隨光開通山林草木人民屋宅兵寇鬼炁盡令消滅無復孑遺四道豁然因祝曰前開後閉天平地昂神公出遊四道開張當令天地通我橋梁前後左右洞達八方我左擲奔星右迅電光流火萬里何妖敢當太一將送萬神來迎有所之向靡不吉良乘雲駕虛上昇太空畢引二目之精各還其宮左取七炁右取七炁燄之畢如此可以冒險涉艱

攻鬼伐兵炁無不應應響盛然其法至妙不得妄傳口口相授而已明慎之焉

五帝流鈴五符威制極天之魔召攝五方神靈上應五晨參落七元下應人身九孔七明周天竟地靡有不關無幽不測無細不鑿有符則光見擲符則振威子若佩之口受師言若在人間遇惡鬼之地當作振威大祝吐向閉炁十二息思五方炁覆冠一身內外暗冥觀無所見因叩齒三十六通嚙五方炁各三嚙炁徐盡入此身存我兩目童子先如流星煥落五方便祝曰

天元七精五帝流鈴煥擲雷光如天奔星光耀十方照鬼真形有何小妖當我生門太上命誅戮無親屠肝剝腹絕鬼滅精千千皆摧萬萬皆傾神威吐祝攝錄無俾使嚙炁三十六過止如此一祝則五方神官皆保甲命卒攝錄所在有靈之炁束縛詣庭三祝則鬼玉滅種若入五嶽周遊山川冒嶮履峻皆當未及其處五步叩左齒三十六通若之東嶽便存東方青帝希林珠官屬九千人衛我前

後左右以青霞之炁覆我身若之南嶽當
 存赤帝丹玄子官屬八千人衛我前後以絳
 雲之炁覆我身若之西嶽當存西方白帝
 少皓靈官屬六千人衛我前後以素霞之炁
 覆我身若之北嶽當存黑帝玄冥皓官屬
 五千人衛我前後以皂雲之炁覆我身若
 之中嶽當思黃帝執中元官屬萬二千人衛
 我前後以黃雲之炁覆我身單祝曰
 乾元耀靈七星玄精五斗華蓋繞絡我形五
 色飛霞混合交并身佩七元流金火鈴煥擲
 無方極天鬱冥五帝神官驅策天兵為我攝
 制山川土地千鬼萬靈皆來東首自送真形
 前諫後戮所捕無停單如此一祝天魔賊迹
 萬鬼來朝遊行五嶽履涉山川無復試觀之
 患五嶽仙官自奉送五芝玉莢來給子身若
 在軍寇之中懸白刃之下厄難之處當叩右
 齒十二通存七星覆我玄光洞映周匝一體
 存肝為木星出在左肺為太白星出在右心
 為絳域星出在前腎為辰星出在後脾為鎮
 星出在背上令五星精炁纏繞前後我身居

斗魁之中五星之下又思五帝神官衛我左
 右祝曰

天為我屋地為我床五嶽山河為我橋梁玄
 斗元精為我衣裳藏身七元之內流火之鄉
 度我者太一務敵過我者白元無英災不能
 干兵不能傷當令我身上詣金闕九老之京
 畢如此在屈厄之中垂終之命便得解脫矣

雲笈七籤卷之五十一



正一天師清微弟子百堅製作
 道教學術資訊網

雲笈七籤卷之五十二

職二

雜要圖訣法

九真行事訣

三月三日五月五日以東流水沐浴燒香於
 左右畢向王氣再拜心祝曰
 太上高真九靈之精使某飛仙登於紫庭沐
 浴華池身神澄清精通太虛五藏自主
 第一真法平旦按手兩膝上閉氣瞑目內視
 存天精君著朱衣巾丹冠坐在心中口出紫
 炁以遠心外九重因叩齒九通嚙液九過祝
 曰
 天精大君來見心中身披朱衣頭巾丹冠左
 佩神符右帶虎文口吐紫華養心凝神赤藏
 自主得為飛仙
 第二真辰時按手如法存堅玉君著素衣巾
 白冠入坐諸骨中此炁分形存之無的所行
 也口出白氣以遠骨九重乃叩齒九通嚙液
 九過祝曰
 堅五大君來入骨中身披素衣頭巾白冠左